

關義府志

卷六十一

鄉賢傳

卷六十二

忠義傳

卷六十三

孝友傳

興義府志卷六十一目錄

列傳 鄉賢傳

饜 深

司馬璋

楊 銘

張 瓚

沈尙經

邵華譜

邵元哲

蔣廷璧

孫 科

侯 馥

蔣 淳

王 儼

張 溶

唐 彝

邵元善

吳鴻儒

蔣宗魯

李 方

興義府志

卷六十一 目錄

一

貴陽文通書局代印

楊 相

孫思述

邵以仁

董紹舒

張國標

張 衡

郭士信 王鎬附在

李體中

王贊武 弟爽附

李定中 李壽附

周 琛

張志皋

王祚遠

葉聯芳

郁德據

沈 弼

劉建吉

盧世昌

李明心

范文安

王秉心 王附

譚明禮 唐附

景壽春  
夏承欽

郭懷仁  
曾日明  
陳曜  
附炳

興義府志

卷六十一  
目錄

二

貴陽文通書局代印

興義府志卷六十一

興義府知府張鎡纂修

列傳

鄉賢傳

鄉賢傳例。惟經題奏。奉

旨入祀鄉賢祠者。始立傳。郡之鄉賢。多尙待題請。是以舊志。竟無鄉賢傳。然以全郡之大。鄉賢實不乏人。如概不立傳。而沒其賢。是卓然賢者。反不如藝術方外。尙得立傳也。烏乎可。今考郡賢之見于正史。及通志。安南志諸書者。並爲立傳。其諸書未及者。博訪嚴核。特爲撰補。以待後人據事實。以題請焉。傳鄉賢。

爨深

興義府志

卷六十一

鄉賢傳

一

賈陽文通書局代印

晉爨深。興古郡人。楚令尹子文之後。晉武帝時。官興古太守。永嘉中。與將軍姚岳。同破後蜀李雄。咸和七年。後蜀李壽。寇甯州。深與建甯太守霍彪。援之。壽破甯州。刺史尹奉。與朱提太守董炳。及霍彪等。皆降于後蜀。惟深與牂柯太守謝恕。不屈。始終爲晉。九年。晉置交州。遷爲交州刺史。卒。見晉書爨使君碑。

侯馥

晉侯馥。字世明。牂柯人。甯州刺史王遜。表薦馥爲江陽太守。未至。時後蜀李雄。已遣僞將李恭。據江陽。馥至。恭舉衆攻之。衆寡不敵。被擒。雄諭降。馥曰。事君之心。有死無二。雄必欲降之。復使人說降。馥怒罵不屈。雄義而釋之。卒全節以終。見晉書。

司馬璋

明司馬璋。普安人。景泰癸酉舉人。官雲南廣西通判。賦性剛介。守己清儉。居官有聲。以下見通志

蔣淳

明蔣淳。字宗厚。普安人。成化戊子舉人。官鶴慶府司理。居官清慎。與時多忤。致政歸。

楊銘

明楊銘。普安人。成化甲午舉人。官富順知縣。淡泊清雅。不尚文飾。

王儼

明王儼。字望之。普安人。成化丁酉舉人。官南康府丞。直諒敦朴。爲後進師表。

張瓚

興義府志

卷六十一

鄉賢傳

二

貴陽文通書局代印

明張瓚。字士玉。安籠所北關人。少孤。依祖母以居。家貧。力學。時安籠  
魁名師。乃遊學於曲靖普安。久之。文益進。以普安州學生。舊志云。曲靖府學生。

通志云。普安州學生。中宏治八年舉人。選上元知縣。累遷松江府知府。有清惠聲。民胥愛戴。年八十。乞歸。與鄉黨相見。恂恂如也。鄉人咸仰之。撰補

張濬

明張濬。安南人。性毅直。幼攻舉子業。正德丁卯舉人。官福州府推官。決獄平恕。不阿上官。有骨鯁風。民皆頌德。俄而改調他府。遂辭官。不復仕。家居時。捐金濟貧。絕跡公門。卒祀鄉賢。見通志。安南志

沈尙經

明沈尙經。普安人。正德庚午舉人。官廣州府同知。才識明敏。訟無遁情。而清操尤著。禁豪強。均徭役。輿論愜服。擢刑部郎。

唐彝

明唐彝。普安人。正德丁卯舉人。歷官郡丞。淵才茂學。不事表暴。居官動循準則。物望歸之。

邵華譜

明邵華譜。普安人。正德丙子舉人。官重慶府同知。明敏善斷。嘗有商被誣盜。立雪其冤。又有妬婦鳩夫。得其情。置之法。一郡稱神。以子元善貴。贈參政。

邵元善

明邵元善。普安人。嘉靖癸卯舉人。官嶧峨知縣。擢戶部郡。調通判。改涿州。以誣被逮。獲釋。謫辰州判。四十五年。冢宰嚴納。奏請破資格。拔幽滯。乃擢元善四川僉事。蓋以治行卓異。從近例也。元善長于詞賦。

興義府志

卷六十一

鄉賢傳

三

貴陽文通書局代印

吟咏甚多。

邵元哲

明邵元哲。普安人。嘉靖乙丑進士。萬歷間。官淮安府知府。淮城東之澗河。通射陽湖。入海。爲輸灌咽喉。久淤。白于上官。疏通之。增築城西長隄。堵黃河下流之決。建閘壩。以通漕艘。士民立像祀之。

吳鴻儒

明吳鴻儒。字文伯。普安人。嘉靖乙酉舉人。官烏撒同知。告歸。居家孝友。精于三易。以授後學。

蔣廷璧

明蔣廷璧。字文光。普安人。嘉靖庚午舉人。初官青城教諭。立教嚴明。捐俸以恤寒士。著璞山教約。遷國學。出判沅江。遂引還。孝友恭儉。寡

言笑。恥談人過。士類景從。淑其教化。著家訓政訓諸書。子宗魯。孫思忠。思孝。曾孫明辰。俱登科第。

### 蔣宗魯

明蔣宗魯。字道父。廷璧子。嘉靖丁酉舉人。是年雲貴始分試。宗魯得售。放榜之辰。黃龍見霄漢間。光燭地。直指曰。此科目之光。盛世之瑞也。諸生當有應者。明年成進士。授濬縣知縣。準田均役。無所私縱。遷戶部主事。備兵臨沅。平那鑑之亂。轉河南廉使。糾伊府之虐。具寘之法。晉雲南巡撫。時有東川土目阿堂。殺其主。自立。蔓延三省。宗魯至。陽調各兵。而陰以土兵。敗賊于野馬川。設奇用伏。不數月而平。阿堂授首。因與嚴嵩忤。乃引歸。著有治濬款議。齊梁監稅錄。吳關奏議。牧政事宜。并疏草詩文集。行世。見一統志

## 興義府志

### 卷六十一

鄉賢傳

四

貴陽文通書局代印

### 附詩

#### 碧雲洞

蔣宗魯

雲水南明萬象天。奇縱異宇洞中懸。瑤壇翠柱虬龍見。華蓋丹崖鵝鵲旋。澗道風泉開遠巘。石門花霧帶平川。蓬瀛仙侶耽春勝。對

酌滄洲思爽然。見黔風舊聞錄

按宗魯所撰諸書。今多佚不傳。此詩見黔風錄。特附載於此。因其人以存其詩。以著郡賢翰墨。

### 孫科

明孫科。普安人。嘉靖己酉舉人。甘貧孝母。久暫不渝。巡撫王諍褒之。有一介不污之語。

### 李方

明李方。安隆人。嘉靖貢生。官耒陽知縣。累遷長沙知府。有循聲。年逾八十。乞歸。家居。克敦晚節。鄉評予之。

楊相

明楊相。安南人。嘉靖貢生。律已端方。遊成均。能以義激臺省。而不指陳其事。歷官丹徒知縣。以年至辭官。林下益敦氣節。卒祀鄉賢。見通志安

志南

張志皋

明張志皋。字汝諧。安南人。隆慶庚午舉人。萬歷初。官昆明知縣。才氣恢洪。鋒棱不露。事上治民。聲稱籍甚。在邑四載。去後。民咸思之。循吏也。卒祀鄉賢。見通志安南志

孫思述

興義府志

卷七十一 一 鄉賢傳

五

貴陽文通書局代印

明孫思述。普安人。萬歷丙子。舉鄉試第一。官新繁知縣。慈祥莊雅。無峻詞遽色。吏民畏愛之。嘗計擒大盜。屢決疑獄。兩稅不違嚴限。民自樂輸。尋擢大理府同知。

王祚遠

明王祚遠。字無近。普安人。舉萬歷癸卯鄉試第二。癸丑成進士。選庶吉士。授檢討。官至吏部左侍郎。祚遠少負異才。下筆萬言立就。凡試牘不起草。既成而後補之。詩文閎肆。書法尤工。充經筵講官。丰神秀整。詞旨清徹。熹宗常日送之。總銓政。進退人才。各當其任。崇禎初。屢與枚卜。負重望。以病請歸。未及大用卒。

邵以仁

明邵以仁。字子任。普安人。萬歷間。官雲南兵備副使。寬簡持大體。一

時幾于刑措。永昌立祠祀之。見通志

### 葉聯芳

明葉聯芳。普安人。萬歷壬午舉人。知長壽縣。有公明廉恕之稱。擢刑部郎歸。置兵興兵館諸田。有功鄉里。

### 董紹舒

明董紹舒。普安人。萬歷戊戌進士。官御史。立朝侃侃。務持大體。多所激揚。

### 郁德據

明郁德據。普安人。萬歷壬午舉人。官龍游縣知縣。摘發奸猾。智在鉤鉅。鉅錘箠之上。而出之以寬仁。轉東昌府通判。士民泣留。遂以通判。仍署縣事。官十載而邑大治。

## 興義府志

### 卷六十一

鄉賢傳

六

貴陽文通書局代印

### 張國標

張國標。南籠人。康熙初以貢生。官田州知州。州有虎患。國標禱於漢壽亭侯廟。引過自責。虎患遂息。州人以爲神。諸生韋昌凡。事母孝。家貧。母老。資廩餼以養。提學置之六等。國標言于提學曰。韋生行優而文劣。倘以行取人。置之優等可也。提學入其言。覆試置之平等。韋生得以不黜。人稱其得古取人之意。補撰

### 沈弼

沈弼。字長垣。普安人。拔貢生。歷任部曹。康熙三十八年。官高州府知府。時高州屢經兵燹。地瘠民貧。弼加意拊循。治尙安靜。不求名譽。以誠率屬。和協文武。禁丞倖。擅受訟牒。除地方供應陋規。添防汛。以靖盜源。設行埠。以便行旅。權化州篆。清虛糧。甦逋戶。減糧額。恤徭民。實

政噴噴人口。以勞瘁卒。士民哀之。請祀名宦。見通志

### 張衡

張衡。南籠人。貢生。官永甯訓導。康熙五十四年設學。雍正六年建府。皆衡首其事。又捐建公署。立碑紀其本末。

### 劉建吉

劉建吉。字慎修。南籠東街人。雍正十三年拔貢生。朝考優等。授知縣之官。河南時河決。民罹水患。建吉奉檄相度水勢。察災民。備得其情。安插得所。上官異之。署甯陵桐柏。修武諸縣事。咸著勞績。補修武知縣。入

覲。以河工製造器具完竣。

賜衣一襲。洊升潼川知府。署劍南道。川北道事。以年至乞歸。家居數年卒。

## 興義府志

### 卷六十一

鄉賢傳

七

貴陽文通書局代印

### 郭士信

王在鎬附

郭士信。安南人。貢生。少孤。事母孝。能養志。母吳氏。以苦節旌。詳節婦傳。雍正中。士信與知縣曾紀常。同撰邑志。旋奉詔。州縣舉端士。為鄉正。知縣何天衢。舉士信。及邑士王在鎬。以應

詔。在鎬亦貢生。品行端方。士大夫重之。見安南志

### 盧世昌

盧世昌。普安州人。今為興義縣人。少從事於羣經。尤精易學。乾隆十九年進士。官豐縣知縣。有政聲。歲饑。開常平倉以振之。先發而後請。劾大吏優容之。但令歲豐補足。加敬焉。久之卒。世昌又善形家言。縣城之建于黃草壩也。實世昌相度之。人以為得陰陽流泉之勢焉。以下

補撰

### 李體中

李體中。字達用。南籠新屯人。乾隆六年拔貢生。朝考優等。授馬平知縣。舊志云懷遠知縣。爲治廉平。民以青天稱之。邑有奸徒。倡爲娘娘錢教。聚數千人。謀不軌。體中廉得首逆。掩擒之。大吏嘉其能。以其名上聞。擢戶部主事。將入都。百姓泣留。爲立生祠。焚香跪送者。十餘里不絕。父老扶杖遠送者。共植竹杖于道側。祝竹復生。已而成林。邑人名之爲青天竹。久之。卒于官。

### 李明心

李明心。字鏡涵。興義縣之魯屯人。魯屯舊屬普安州。明心以普安州學生。中乾隆三十年舉人。嘉慶中。立興義縣。魯屯屬興義縣。故爲興義縣人。明心既舉于鄉。一應會試。以父母年老。遂不復應試。及大挑。又不赴。五十六年。截取選隆昌知縣。縣當孔道。徭役繁重。明心至。創立章程。役有可已者。已之。不可已者。量民力而任之。又出耗羨金。爲之募雇而助之。民咸稱便。及其去也。代者不能如明心之所爲。民又大困。或有訴之於部者。尙云李父母不病民也。居隆昌無幾。而西藏將用兵。總督檄取才吏。大吏咸以明心名。應俄而課最入。

覲既返。留省城。讞決積案。嘉慶元年。調富順。數平反冤獄。時川中妖賊四起。大兵連歲征勦。明心練鄉勇。日於郊外操演。賊偵知有備。不敢入境。大吏賢之。令署梁山縣事。以扼夔門賊衝。未至。擢臺灣同知。駐淡水。淡水有小刀會者。奸民糾集爲亂。明心至。率兵滅之。時海寇方熾。明心於諸海口築礮臺。樹木柵。六年。安南僞總兵黃勝長。掠臺

灣有數十戰艘。近淡水海岸。明心督鄉勇擊沈。獲其首領十九人。餘多溺死。事聞奉

旨入覲。記名以知府用。返閩。授汀州知府。汀州城多崩毀。出金二千。修之。時江西石城有妖賊。常掠汀。明心以計擒之。而讓功於人。永定有巨盜。百姓苦之。明心掩殺之。境內肅然。又修學校書院。以興文教。十年。以疾乞歸。家居十餘年。府之文廟及魯屯之橋梁道路。李氏之祠及譜牒。皆以時修葺。道光三年卒。年百歲。汀人請入名宦祠。子之青。拔貢生。

王贊武

弟爽  
武附

王贊武。字建東。普安州人。今爲興義縣人。工制藝。乾隆三十一年舉人。官知縣。署墊江縣事。補峨眉。調南郡。咸有政聲。初川匪王三槐爲

興義府志

卷六十一

鄉賢傳

九

賈陽文通書局代印

亂陷州縣以十數。時贊武在峨眉。民有青天之頌。賊重其廉。不忍犯境。大吏以南部爲賊衝。宜得人以扼之。乃調贊武於南部。南部百姓聞贊武至。皆喜曰。峨眉王青天來。吾屬無憂矣。賊聚邑境。數月不忍犯。贊武冀其有就撫意。單騎入賊營。勸諭之。三槐等跪迎。莫敢犯。然終無降志。但感贊武之清惠。不加害耳。贊武乃還。已而官兵勦之急。賊乃攻邑之富村驛。驛人告急。贊武夜赴之。賊不知贊武也。戕之。已而撫其尸曰。誤殺吾父母。賊營皆哭。時嘉慶七年也。事聞

予雲騎尉世職。無子。以弟爽武之子景松爲子。景松生員。襲雲騎尉。爽武字宗岐。乾隆丁酉舉人。亦工文。與贊武齊名。兄弟共著有怡怡堂制義。爲邵晉涵。茹芬。張甄陶所賞。爽武歷官餘姚。天台。黃巖。嘉善。知縣。有循名。時人稱爲王氏二難。

范文安

范文安。字國欽。南籠人。乾隆四十八年舉人。選東莞知縣。東莞陋規。凡邑宰莅任。洋商有供獻銀數千。文安卻之。或曰。此無害於政。而可以自裕。何弗受。文安曰。洋稅有正供。非正而取。謂之貪。貪烏乎可。居東莞三年。其清潔不異初至。以乞終養歸。凡有餽遺。弗受。父老以茉莉花十盆獻。亦弗受。父老進曰。願使君以此娛老。封君耳。乃受之。去之日。送者盈道。邑人爲立生祠。久之。卒於家。

李定中

李壽昌附

李定中。南籠人。乾隆貢生。官清溪訓導。以淡素自持。而樂資助貧士。士有佳者。誘誨之。愛如子弟。後以年至。乞歸卒。李壽昌。字慶長。亦南籠人。貢生。官甕安訓導。性和易。喜以善事善言告人。士林感化者甚

興義府志

卷六十一

鄉賢傳

十

賈陽文通書局代印

衆。後引年歸卒。

王秉心

王秉一附

王秉心。字正甫。南籠人。乾隆舉人。嘉慶二年。狝苗之變。助守城有功。賜官長沙通判。洊升永安知州卒。所至有惠政。著循聲。王秉一。字以清。亦南籠人。貢生。官獨山訓導。工詩文。恬靜寡言。不阿事人。居三年。乞歸卒。著有以清詩集一卷。

周琛

周琛。字惟賢。興義府人。生員。嘉慶二年。苗變。傾家召募義勇。助守城。又稱貸以賑飢民。伐園木以供守城爨。親帥義勇出戰。屢勝之。事平。敘功入奏。

天子嘉之。賜官通判。琛之官雲南。攝祿豐縣事。祿豐地居衝要。差繁。

民困。號爲難理。大吏以琛能。令攝篆。琛莅任。不以操切臨民。有急徭。輒因勢籌畫以應。居一年。民安之。已而代者至。紳士父老。詣大吏請留。格于例。弗獲。旋攝彌勒篆。亦有惠政。久之卒。

附詩

贈周別駕

有序

董健

洛陽人

嘉慶二年。南籠苗民倡亂。攻圍郡城。時總鎮張玉龍兵。湖北征匪。郡守曹廷奎驚懼。闔門自縊。吏民倉卒聞變。號呼震天。莫知所爲。公以諸生倡義。毀家舒難。抗節守城。凡六閱月。城中食盡。旦夕待斃。會大兵雲集。公膺授首。而狐城巋然獨存者。公之功也。事聞。

朝廷嘉之。特擢郡倅。來滇數載。兩攝符竹。仁聲惠政。遠邇爭傳。

興義府志

卷六十一

鄉賢傳

十一

賈陽文通書局代印

余適掌教彌勒桂香書院。獲與數晨夕者。半載餘時。公方莅彌勒也。頃奉檄北上。匆匆賦別。敬裁長句奉贈。

書生能文更能武。手斫潛蛟射猛虎。迂儒紙上慣談兵。緩急從來竟何補。平生幾見偉男兒。弔古憑今有所思。班超無人終軍殞。慷慨悲歌徒爾爲。先生大有古人風。自爲諸生便不同。少年學書兼學劍。奇氣直欲吞長虹。有苗無端亂天紀。南籠城外屯封豕。驀地腥風捲地來。守城太守闔門死。滿城號呼聲如焚。倉卒天高那易聞。羽檄蠟書空旁午。睢陽不見賀蘭軍。羣議紛紛計出走。託妻寄子復何有。先生瞋目仗劍呼。此城一去誰與守。大厦原非一木支。臨危引避空鬚眉。頭顱誓與城俱碎。便作南八死亦奇。不惜家貲散萬金。不惜家山好園林。

傾家輸粟振救稱貸益之灌  
木滿園悉斬伐以供樵采

拚到無家

兼無我。尚有蒼蒼鑒此心。可憐倦鳥棲無木。空倉饑鼠竄空谷。枵腹執戈夜不眠。守陴壯士吞聲哭。城被圍日久。食且盡。居民日夜巡警。至併日食一粥。尚不可得。當時只是矢孤忠。模糊征袍戰血紅。時帥鄉兵出城與賊戰。妖氛頓靖由天幸。轉禍爲福誰尸功。膚功入奏

天顏喜。詔謂先生來金齒。蒼生有幸先生來。先生還爲蒼生起。先生之功在桑梓。先生吏治緒餘耳。至竟清名無翼飛。到處口碑噪人耳。琴鶴初駐瓜江隈。我曾親覘雅化來。慈雲更作山湖雨。有腳陽春幾費猜。催科無擾征徭薄。張公爲政乃真樂。民猶驕子恐難馴。手栽桃李向南郭。我來正逢花時節。桃花如錦李如雪。花前恰好共論文。不道匆匆又賦別。賢勞由來王事多。錦江春浪潞河坡。南浦風烟君去也。紅亭綠酒奈君何。送君底事最愴神。眼前多少

興義府志

卷六十一

鄉賢傳

十一

賈陽文通書局代印

泣路人。攀轅臥轍留不得。淚溢秋水碧粼粼。吾語諸君休擗搯。別淚莫逐西風灑。轉眼還君郭細侯。好看兒童騎竹馬。

譚明禮唐士元附

譚明禮興義府人。生員。嘉慶初助守城有功。

賜六品冠服。官彌渡通判。攝新平。元謀鶴慶。石屏。諸州縣篆。治石屏爲民鑿渠。疏通水患。民立生祠。唐士元字燮之。亦郡人。舉人。以助守城功。

賜六品冠服。俄以大挑入選。官沂州通判。居官多德政。卒于官。

景壽春

景壽春字介菴。興義府人。父震。見文學傳。壽春幼有至性。以孝友聞。嘉慶二年。叛苗圍城。父老咸助守城。壽春甫束髮受書。毅然登陴。曰

父兄有急。安可日事佔畢。以自逸。事平。仍俛首事制舉業。俄母卒。居喪以毀瘠聞。事父及繼母孝。六年。補府學弟子員。十五年。舉於鄉。十六年。丁父艱。哀毀骨立。勺飲不入口。長者規之。始稍進飭粥。道光六年。大挑一等。以知縣用之。官江蘇。數讞決疑獄。旋署蘇州督糧同知。以賑災有法。爲大吏保奏。七年。署鎮洋縣事。下車見學廟傾頽。爲修復。時河決。運道不通。將倣元時故事。爲海運。而吳淞江又壅塞。大吏議濬吳淞江。以壽春能。令監濬工竣。加一級。補鎮洋知縣。鎮洋之刁民。習以病死嬰孩。挾詐良懦。壽春按律治之。其風遂息。十一年秋。江蘇大水。調丹徒。請賑。並捐俸助之。每散賑。必躬親監試。民得受實惠。十二年。丹徒旱。親巡四鄉。勸民種菽。卒獲其收。而民困以甦。明年。丹徒復大水。請賑。勸賑。並捐俸以先之。明年麥熟。始罷賑。大吏嘉之。保

興義府志

卷六十一

鄉賢傳

十三

賈陽文通書局代印

奏。升同知。十四年。調補長洲知縣。十六年。升通州知州。州俗喜訟。壽春訊決無留。所處咸當其情。訟風頓息。二十年。署徐州知府。二十二年。外夷英吉利沿海爲寇。直入內地。壽春練鄉勇。先事防堵。境內晏然。久之。卒於官。壽春篤於宗族鄉黨。貧者無不資乏。府文廟將圯。爲修葺。又購田歸之官。歲收其租。爲郡士試卷費。郡之應鄉試者。別捐金。爲三科卷費。其愛士如此。子其淦。以優貢生。官荆溪知縣。加同知銜。其濬。官翰林院編修。

郭懷仁

郭懷仁。字念士。興義府人。少孤。事母以孝聞。友於兄弟。鄉黨稱之。學制舉業。一試不售。遂棄去。而服賈。西入滇。南走粵。備知其風俗形勢。生平重然諾。人無知與不知。皆慕之。有所疑。欲誓盟立信者。但願得

郭念士一言。卽已。與武生夏承欽友善。常共賈。尙義讓。有管鮑風。嘉慶二年。狎苗反。圍府城。知府曹廷奎自經。署經歷金淳。謀守禦計。懷仁與承欽。急約舉人唐士元。王秉心。拔貢生李瓊英。武舉人王亨第。劉君用。把總楊文海。諸生周琛。譚明禮。與金淳共謀。曰。城非可枵腹守也。宜先籌食與餉。可先勸紳商助銀千兩。借庫銀三千。借廣商銀二千。備緩急。搜城中粟。得米三千石有奇。懷仁曰。城無憂矣。淳乃與文海。令壯者乘城。官紳義勇。分守各門。令懷仁與承欽。主公局支發銀米事。士元。秉心。瓊英。助之。亨第。君用。及文海之子國珍。主募勇士。部署定。城中無業饑民。不任乘城者。懷仁恐爲賊內應。告之淳。淳與懷仁。謀之江西商人曾鳳麟。鳳麟願設廠施粥以聚之。弭其變。於是逆苗屢攻不克。而城中時出擊之。勇士張運吉。射不虛發。羅天申。善腰刀。唐紹基。善刀矛。逾數日。輒一出城。取賊首級。及其久也。視之如無賊。而天申卒爲賊伏兵。火鎗擊死。人咸惜之。懷仁主公局。支發無所苟。咸應時給。無不感。守六月。雲貴總督勒保始至。嘉其功。題請賜六品冠服。

上諭云。民人郭懷仁。向義急公。甚堪嘉尙。若僅給予六品頂戴。尙不足以示獎勵。加恩著將南籠府。改爲興義府。永錫嘉名。以示鼓勵。於不忘是役也。郡人以懷仁首建義。咸歸功焉。而懷仁謙不自居。人言及之。讓功於同事。士大夫以此愈重之。久之。卒於家。

附詩

贈郭懷仁

舒

位大興人

我觀世所重。仕宦躋顯要。其次冠儒冠。撫拾供吟嘯。鄉黨有布衣。

屏不作同調。一日事緩急。各各無相弔。試問十二牛。秦師誰所犒。讀破未燒書。幾爲商賈笑。南籠有義人。雲龍而霧豹。四坐且勿喧。聽我前致導。郭姓懷仁名。念士其自號。家居城北門。素業習耕釣。稍積所贏資。市逐什一耗。雖未免鄉人。在鄉名則邵。其不善者惡。而其善者好。去年三苗叛。孤城中飛礮。堅守春徂夏。彫眠感遺噍。念士散其財。念士助其糶。城中一切事。實惟念士劬。援師克普坪。羣醜撲原燎。艱難捍禦功。元戎以疏報。

至尊顧嘉歎。改郡奉明詔。好義則民興。君子是則倣。榮名何奕奕。殊施亦浩浩。念士不簪纓。念士不學校。乃迹其所行。二者不能到。嗟彼浮靡徒。空談尠有效。見義忽無勇。指瑕仍自蹈。或生鄙吝心。秦越視肥磽。或生恇怯心。弩末不穿縞。且有最黠者。藉此營爲盜。

種種諸變相。秦鏡不可照。孰有如念士。始終絕戀繆。我贈念士詩。不識念士貌。吾友李他山。嘗以此事告。他山不妄言。所譽信非冒。將爲斯取斯。豈曰道非道。草以風知勁。樹以雪辨操。士生天壤間。必無僞忠孝。茲事既可傳。茲人亦惟肖。勉哉守元牝。行矣飛黃鷄。借君仗義名。添我吟詩料。見瓶水齋集

夏承欽

夏承欽。字金堡。興義府人。父晏。孝子也。詳孝友傳。晏卒。承欽事母。復以孝聞。初學制舉業。已而棄之。以善射。爲府學武生。爲其母請於有司。得

旌表。嘉慶元年。知府以其名應孝廉方正。已達於司道。承欽以母老辭。或勸之行。承欽曰。違母養。非孝。見榮耀而趨之。不廉。不孝。不廉。烏

乎方正。卒辭之。及狝苗變。承欽佐郭懷仁創義。身任勞怨。於守城事。多所籌畫。經歷金淳。把總楊文海。多從其言。圍解。勒保奏請。賜六品冠服。承欽及懷仁義名。著于南域。貴西道王某。賦詩以美承欽。郡人榮焉。久之卒。

曾日明

陳炳曜附

曾日明。字濬哲。興義府人。嘉慶五年。舉于鄉。官黃平學正。孝友長厚。人無間言。卒于官。陳炳曜。安南人。貢生。官甕安訓導。家居排難解紛。平治道路。居官善教士子。士論翕然。稱賢師儒。

按今府學。名宦祠。鄉賢祠。皆無栗主。異日賢有司。覽郡志。而擇其尤以上請。

賜祀入祠。是亦郡之光也。